

**НИЙСЛЭЛИЙН ЗАСАГ ДАРГА БОЛОН СОНГИНОХАЙРХАН ДҮҮРГИЙН  
ЗАСАГ ДАРГЫН ХООРОНД ЗАСГИЙН ГАЗРЫН ЗАРИМ ЧИГ  
ҮҮРГИЙГ ОРОН НУТАГТ ТӨЛӨӨЛӨН ХЭРЭГЖҮҮЛЭХ,  
НИЙСЛЭЛИЙН ЗАСАГ ДАРГЫН ҮЙЛ АЖИЛЛАГААНЫ  
ХӨТӨЛБӨР, НИЙСЛЭЛИЙН НИЙГЭМ ЭДИЙН ЗАСГИЙН  
2016 ОНЫ ЗОРИЛТЫГ ХЭРЭГЖҮҮЛЭХ ГЭРЭЭ**

2016 оны 01 дүгээр  
сарын 25-ны өдөр

№

Улаанбаатар  
хот

Нэг. Нийтлэг үндэслэл

- 1.1. Энэхүү гэрээний зорилго нь Төсвийн тухай хуулийн 39 дүгээр зүйлд заасан Засгийн газрын зарим чиг үүргийг орон нутагт төлөөлөн хэрэгжүүлэхээр Нийслэлийн Засаг дарга /цаашид "Захиалагч" гэх/ болон Сонгинохайрхан дүүргийн Засаг дарга /цаашид "Төлөөлөн хэрэгжүүлэгч" гэх/ -ын хооронд үүсэх эрх, үүрэг, санхүүжилтийг тодорхойлоход ашигласан тоон болон чанарын шалгуур үзүүлэлт, санхүүгийн болон гүйцэтгэлийн мэдээллийг тайлагнахад тавигдах шаардлага, гэрээг дүгнэхтэй холбогдох харилцааг зохицуулахад оршино.
- 1.2. Нэг талаас Нийслэлийн Засаг дарга бөгөөд Улаанбаатар хотын захирагч Э.Бат-Үүл, нөгөө талаас Сонгинохайрхан дүүргийн Засаг дарга М.Чинболд нар 2016 оны 01 дүгээр сарын 01-ний өдрөөс 2016 оны 12 дугаар сарын 31-нийг дуустал нэг жилийн хугацаатайгаар энэхүү гэрээг байгуулж 2 хувь зүйлдэв.
- 1.3. Энэхүү гэрээтэй холбогдох бусад асуудлыг Төсвийн тухай хууль, Төрийн албаны тухай хууль, Монгол Улсын 2016 оны Төсвийн тухай хууль болон холбогдох хуулиудаар тус тус зохицуулна.

**Хоёр. Захиалагчийн эрх, үүрэг**

- 2.1. Дүүргийн Засаг даргад өөрийн нутаг дэвсгэрт төлөөлөн хэрэгжүүлэх хөтөлбөрт зориулж нийт 58 тэрбум 156,1 сая төгрөгийн зардлыг өөрийн багц дахь улсын төсвөөс олгох тусгай зориулалтын шилжүүлгээр энэхүү гэрээний 4 дүгээр зүйлд заасны дагуу санхүүжүүлнэ.
- 2.2. Гэрээний нөхцөл болон хөтөлбөрийн хэрэгжилтийн явцад хяналт тавих бөгөөд ажлын уялдааг хангаж ажиллана.

- 2.3. Гэрээний хэрэгжилтийг хангах зорилгоор дүүргийн Засаг даргад мэргэжил, арга зүйн дэмжлэг, туслалцаа үзүүлнэ.
- 2.4. Энэхүү гэрээний 6 дугаар зүйлд заасан тоон болон чанарын шалгуур үзүүлэлтийг хангагүй бол гэрээний 7.2-д заасан дүгнэлтийн хамт хөтөлбөрийн санхүүжилтийг бууруулах, зогсоох талаарх саналаа танилцуулж, шийдвэрлүүлнэ.

**Гурав. Төлөөлөн хэрэгжүүлэгчийн эрх, үүрэг**

- 3.1. Төсвийн тухай хуулийн 61.1-д заасан чиг үүргийг хэрэгжүүлэх зорилгоор арга зүй, зохион байгуулалтын шуурхай удирдлагаар хангах, зохицуулах үйл ажиллагааг нутаг дэвсгэрийнхээ хэмжээнд эрхлэн гүйцэтгэж, уг гэрээнд тусгагдсан хөтөлбөрийг хэрэгжүүлэн, түүний үр дүнг Нийслэлийн Засаг даргын өмнө хариуцна.
- 3.2. Засгийн газрын зарим чиг үүргийг хэрэгжүүлэгч орон нутгийн байгууллагуудын удирдах албан тушаалтныг томилох, чөлөөлөх, халах болон эрх бүхий байгууллагатай зөвшилцөхдөө Төрийн албаны тухай хууль болон холбогдох бусад хууль тогтоомжийг мөрдөнө.
- 3.3. Энэхүү гэрээний 3.2-т заасан байгууллагын бүтэц, зохион байгуулалт, бодлогын асуудлаар шийдвэр гаргахдаа холбогдох Нийслэлийн Засаг даргатай зөвшилцнө.
- 3.4. Засгийн газрын зарим чиг үүргийг өөрийн нутаг дэвсгэрт төлөөлөн хэрэгжүүлэхдээ Төсвийн тухай хуулийн 39.4-т заасан шаардлагыг хангаж ажиллана.
- 3.5. Засгийн газрын зарим чиг үүргийг хэрэгжүүлэгч орон нутгийн байгууллагуудын төсвийн шууд захирагч нартай хөтөлбөрийг хэрэгжүүлэх, үр дүнгийн гэрээг байгуулах бөгөөд үр дүнгийн гэрээ нь энэхүү гэрээг үндэслэсэн байна.
- 3.6. Дүүргийн Засаг дарга нь энэхүү гэрээний 7 дугаар зүйлийн 7.1-д заасан тайлант хугацаанд хэрэгжилтийн тайлланг ирүүлнэ.
- 3.7. Дүүргийн төсвийн байгууллага болон орон нутгийн өмчийн оролцоотой аж ахуйн нэгж, байгууллагын төсвийн орлого, зарлага, тайлангийн бүх

мэдээллийг олон нийтэд ил тод байхаар Шилэн дансны тухай хуулийг хэрэгжүүлж ажиллана.

- 3.8. 2016 оны 07 дугаар сарын 01-ний өдрөөс эхлэн дагаж мөрдөх Захиргааны өрөнхий хуулийг төрийн байгууллагын албан хаагч, иргэд, аж ахуйн нэгжид сурталчлах ажлыг зохион байгуулж ажиллана.
- 3.9. 2015 оны дүүргийн үйл ажиллагааны үр дүнг үнэлсэн ажлын хэсгээс хүргүүлсэн зөвлөмж, дүгнэлтэд заагдсан ажлыг тусгай төлөвлөгөө гарган хэрэгжүүлж хагас, бүтэн жилээр тайлангийн хамт, үр дүнг нь үнэлэн нийслэлийн Засаг даргын Тамгын газрын Хяналт, шинжилгээ, үнэлгээний хэлтэст ирүүлж ажиллана.
- 3.10. Ариун цэврийн тухай, Захиргааны хариуцлагын тухай, Хог хаягдлын тухай хууль, тогтоомж, Нийслэлийн Иргэдийн Төлөөлөгчдийн Хурлын Тэргүүлэгчдийн 2009 оны 63, 2012 оны 61 дүгээр тогтоолын хэрэгжилтийг нутаг дэвсгэртээ зохион байгуулж, илэрсэн зөрчлийг арилгуулах, орчны тохижилт, цэвэрлэгээний шаардлагыг хангуулах замаар хотын өнгө үзэмжийг сайжруулахад хувь нэмэр оруулах, гадна талбайн угаалга, цэвэрлэгээ, ногоон байгууламжийг нэмэгдүүлэх ажлыг хариуцан зохион байгуулна.
- 3.11. Нутаг дэвсгэрийн хэмжээнд Хөдөлмөрийн тухай хуульд нийцүүлэн Хамтын гэрээг бүртгэх, хамтын хэлэлцээрийг байгуулах, бүртгүүлэх ажлыг зохион байгуулж, ажилтан албан хаагчдын цалин хөлснөөс хуульд зааснаас бусад хураамж, шимтгэлийг шууд суутган тооцохыг таслан зогсоо арга хэмжээ авна.
- 3.12. Нийслэлийн Иргэдийн Төлөөлөгчдийн Хурлын Тэргүүлэгчдийн 2014 оны 07 дугаар тогтоолоор батлагдсан “Нийслэлийн худалдаа, үйлчилгээний нийтлэг журам”, 56 дугаар тогтоолоор батлагдсан “Нийслэлийн нутаг дэвсгэрт түргэн үйлчилгээний цэг ажиллуулах журам”-ын хэрэгжилтийг нутаг дэвсгэрийн хэмжээнд зохион байгуулна.

- 3.13. Дүүргийн Засаг даргын Тамгын газрын дарга болон төсвийн шууд захирагч нарын Төсвийн тухай хуулийн 16.5-д заасан бүрэн эрхийн хэрэгжилтэд хяналт тавина.
- 3.14. Албан үүргээ гүйцэтгэхдээ нэгдмэл сонирхолтой болон хамаарал бүхий этгээдтэй холбоотойгоор олон нийтэд төрийн албан хаагч, төрийн албанад эргэлзээ төрүүлэх, итгэлийг нь алдах шинжтэй аливаа үйлдэл, эс үйлдэл гаргахгүй байна.
- 3.15. Үр дүнгийн гэрээний биелэлтийн тайланг хагас бүтэн жилд төсвийн ерөнхийлөн захирагчид тайлagnаж ажиллана.

**Дөрөв. Улсын төсвөөс олгох тусгай зориулалтын  
шилжүүлэг хийх, зардлын зориулалт**

- 4.1. Төлөөлөн хэрэгжүүлэгч нь өөрийн нутаг дэвсгэрт хэрэгжүүлэх хөтөлбөрийн санхүүжилтийг бүтэн жилээр тооцно.
- 4.2. Хөтөлбөрийн санхүүжилтийг энэхүү гэрээний хавсралтад тусгагдсан хөтөлбөрийн төсөв, хөтөлбөрийн шалгуур үзүүлэлт, хүрэх үр дүн болон Нийслэлийн Засаг даргын баталсан төсвийн сар, улирлын хуваарийн дагуу Төрийн сангийн нэгдсэн дансаар дамжуулан гүйцэтгэнэ.
- 4.3. Нийслэлийн Төрийн сан нь тусгай зориулалтын шилжүүлгийг дүүргийн Төрийн сангийн дансанд сар бүрийн тогтсон хуваарьт өдрүүдэд багтаан шилжүүлнэ.
- 4.4. Дүүргийн төрийн сан нь Засгийн газрын зарим чиг үүргийг хэрэгжүүлэгч орон нутгийн байгууллага тус бүрийн санхүүжилтийг төсвийн дансанд ажлын гурван өдөрт багтаан шилжүүлнэ.

**Тав. Нийслэлийн Засаг даргын 2013-2016 оны үйл ажиллагааны  
хөтөлбөр, Нийслэлийн эдийн засаг, нийгмийн 2016 оны  
зорилтыг хэрэгжүүлэх**

- 5.1. Нийслэлийн Засаг даргын 2013-2016 оны үйл ажиллагааны хөтөлбөрөөс хавсралт 1-т заасан үйл ажиллагааг дүүргийнхээ нутаг дэвсгэрийн хэмжээнд зохион байгуулан, биелэлтийг хагас бүтэн жилээр тооцон, нийслэлийн Засаг даргын Тамгын газрын Стратегийн бодлого төлөвлөлтийн хэлтэст өссөн дүнгээр гаргаж хүргүүлнэ.

- 5.2. Нийслэлийн Засаг даргын 2013 оны А/01 дугаар захирамжаар батлагдсан Эрүүл аюулгүй байдлын индекс тооцох үзүүлэлтийн дагуу цогц ажил дүүргийн хэмжээнд зохион байгуулж, хэрэгжүүлж, нэгдсэн удирдлагаар ханган ажиллана.
- 5.3. Нийслэлийн эдийн засаг, нийгмийн 2016 оны зорилтоос энэ гэрээний хоёрдугаар хавсралтад тусгагдсан үйл ажиллагааг дүүргийнхээ нутаг дэвсгэрийн хэмжээнд зохион байгуулан, биенэлтийг улирал бүр гарган нийслэлийн Засаг даргын Тамгын газрын Стратегийн бодлого төлөвлөлтийн хэлтэст гаргаж хүргүүлнэ.
- 5.4. Харьяа газар, хэлтэс, иргэд, аж ахуйн нэгж байгууллагын оролцоотойгоор Эрүүл аюулгүй байдлын индексийн шалгуур үзүүлэлтийг сайжруулахад чиглэсэн үйл ажиллагааг зохион байгуулж, үр дүнг тооцсон байх.
- 5.5. Хороодын эрүүл аюулгүй байдлын индексийн түвшинг ахиулахаар хорооны Засаг даргаас зохион байгуулж буй ажлыг дэмжих, ажиллах нөхцлийг бүрдүүлнэ.
- 5.6. Эрүүл аюулгүй байдлын индексийн түвшинг ахиулаагүй болон буурсан тохиолдолд гэрээний үүргийг биелүүлээгүйд тооцно.
- 5.7. Иргэдийн амьдрах орчны зураглалын талаар гаргасан бодлого шийдвэрийн хэрэгжүүлэх үйл ажиллагааг зохион байгуулж ажиллана.
- 5.8. Нийслэлийн Засаг даргаас дүүргийн Засаг даргад эрх шилжүүлэн хэрэгжүүлж буй энэ гэрээний З дугаар хавсралтад заасан хөрөнгө оруулалтын төсөл арга хэмжээний гүйцэтгэл, үр дүнг Нийслэлийн Засаг даргын өмнө хариуцна.
- 5.9. Нийслэлийн Иргэдийн Төлөөлөгчдийн Хурлын 2014 оны 19/24 дугаар тогтоолоор батлагдсан “Найрсаг Улаанбаатар” хөтөлбөрийн хүрээнд нийтийн биеийн тамир, спорт, соёл урлагийн болон иргэдийн амгалан тайван байдал, амьдралын чанар сайжруулахад чиглэсэн арга хэмжээг зохион байгуулж ажиллана.
- 5.10. Нийслэлийн Иргэдийн Төлөөлөгчдийн Хурлын 2015 оны “Авлигын эсрэг нийслэлийн хөтөлбөр, стратеги төлөвлөгөө батлах тухай” 23/01 дугаар тогтоолын хэрэгжилтийг зохион байгуулж ажиллана.

- 5.11. Нийслэлээс 2016 оны төсвийн жилд Сонгинохайрхан дүүрэгт 3 тэрбум 533,3 сая төгрөгийн санхүүгийн дэмжлэг олгоно.
- 5.12. Нийслэлийн Орон нутгийн хөгжлийн сангаас Сонгинохайрхан дүүрэгт 3 тэрбум 287,9 сая төгрөгийн төсөл арга хэмжээг Орон нутгийн хөгжлийн сангийн журмын дагуу зохион байгуулж хэрэгжүүлнэ.
- 5.13. Энэ гэрээний 4 дүгээр хавсралт батлагдсан “Байгууллагын 2015 оны үйл ажиллагаанд хийсэн хяналт шинжилгээ, үнэлгээ”-нд үндэслэн Нийслэлийн Засаг даргын Тамгын газраас гаргасан зөвлөмжийг хэрэгжүүлж ажиллана.
- 5.14. Нийслэлийн төсөвт батлагдсан дүүргийн төрийн сангаар дамжин санхүүжиж буй нийгмийн халамжийн сангийн хөрөнгийн зарцуулалтанд хяналт тавин, олгож, гүйцэтгэл үр дүнг нийслэлийн төсвийн Ерөнхийлөн захирагчын өмнө хариуцна.
- 5.15. Нийслэлийн иргэдийн Төлөөлөгчдийн Хурлын Тэргүүлэгчдийн 2015 оны 187 дугаар тогтоолоор батлагдсан тэнэмэл амьдралтай иргэдийг нийгэмшүүлэх “Гэртээ харих зам” хөтөлбөрийн хэрэгжилтийг дүүргийн хэмжээнд зохион байгуулан ажиллах, хэрэгжилтийн тайланг хагас бүтэн жилээр, холбогдох байгуулагуудад хүргүүлэх
- 5.16. Нийслэлийн иргэдийн Төлөөлөгчдийн Хурлын Тэргүүлэгчдийн 2015 оны 200 дугаар тогтоолоор батлагдсан “Хүүхдэд ээлтэй Улаанбаатар” хөтөлбөрийн хэрэгжилтийг дүүргийн хэмжээнд зохион байгуулан ажиллах, хэрэгжилтийн тайланг хагас бүтэн жилээр холбогдох байгуулагуудад хүргүүлэх
- 5.17. Нийслэлийн иргэдийн Төлөөлөгчдийн Хурлын Тэргүүлэгчдийн 2015 оны 126 дугаар тогтоолоор батлагдсан “Хөршийн хяналт” хөтөлбөрийн хэрэгжилтийг дүүргийн хэмжээнд зохион байгуулан ажиллах, хэрэгжилтийн тайланг хагас бүтэн жилээр холбогдох байгуулагуудад хүргүүлэх

**Зургаа. Гэрээний хэрэгжилтийг дүгнэх тоон болон  
чанарын шалгуур үзүүлэлт**

- 6.1. Энэхүү гэрээний хавсралтаар батлагдсан шалгуурыг хангасан эсэхийг үнэлэхдээ Төсвийн тухай хууль болон тухайн салбарт мөрдлөг болгож буй дүрэм, журам, заавар, стандарт, нормыг үндэслэл болгоно.

- 6.2. Гэрээний хавсралтын дагуу тухайн онд хэрэгжүүлэх, дүүрэгт шилжүүлж буй чиг үүргийг хөтөлбөр, арга хэмжээ, түүнд шаардагдах урсгал болон бусад зардлын тоон дүн тус бүрээр, хөтөлбөрийн хүрэх үр дүнгийн талаарх чанарын болон тоон үзүүлэлтийг дэлгэрэнгүй жагсаалтаар тус тус батална.

**Долоо. Гэрээний хэрэгжилтийг тайлагнах, гэрээг дүгнэх**

- 7.1. Санхүүгийн улирлын тайланг дараа улирлын эхний сарын 15-ны дотор, хагас жилийн тайланг 7 дугаар сарын 25-ны өдрийн дотор, жилийн тайланг дараа оны 2 дугаар сарын 5-ны өдрийн дотор батлагдсан заавар, журмын дагуу гаргаж, хөтөлбөрийн үр дүнгийн тайлангийн хамт тухайн төсвийн ерөнхийлөн захирагчид ирүүлнэ.
- 7.2. Нийслэлийн Засаг даргын үйл ажиллагааны хөтөлбөр, Нийслэлийн нийгэм, здийн засгийн 2016 оны зорилтын биелэлтийг улирал тутамд гарган Нийслэлийн Засаг даргын Тамгын газарт хүргүүлнэ
- 7.3. Захиалагч нь гэрээний биелэлтийг хагас, бүтэн жилээр дүгнэж, аудит хийлгэнэ.
- 7.4. Хөтөлбөрийн үр дүн, тоо хэмжээ, чанарыг энэхүү гэрээний 6.1-д заасныг удирдлага болгон дараах хэлбэрээр зохион байгуулна. Үүнд:
- 7.4.1 Дүүргийн Засаг дарга Засгийн газрын зарим чиг үүргийг хэрэгжүүлэгч байгууллагуудын жилийн эцсийн нэгдсэн санхүүгийн болон хөтөлбөрийн үр дүнгийн тайланг Нийслэлийн Засаг дарга үнэлнэ. Ингэж үнэлэхдээ харьяа байгуулагууд болон нэгжүүдийн ажилтнуудыг хамруулан оролцуулж тайланг дүгнэнэ.
- 7.4.2 Шаардлагатай бол тусгайлсан мэргэжлийн байгууллагаар үнэлгээ хийлгэнэ.

**Найм. Гэрээний хугацаа**

- 8.1. Энэхүү гэрээний нийт хугацаа төсвийн жилийн хүрээнд үйлчилнэ.

**Ес. Гэрээний үнэ**

- 9.1. Энэхүү гэрээний нийт төсөвт өртөг 64 тэрбум 977,4 сая төгрөг байна.
- 9.2. Энэхүү гэрээний нийт үнийн төсөвт өртгийг хөтөлбөр тус бүрээр энэхүү гэрээний хавсралтаар батална.

#### **Арав. Гэрээнд нэмэлт, өөрчлөлт оруулах, гэрээг цуцлах**

- 10.1. Хүндэтгэн үзэх шалтгааны улмаас гэрээний заалтыг хэрэгжүүлэх боломжгүй болсон тохиолдолд гэрээнд оролцогч талууд харилцан бичгээр санал тавьж, зөвшилцэн гэрээнд нэмэлт, өөрчлөлт оруулж болно.
- 10.2. Гэрээнд тусгагдаагүй хөтөлбөрийг хэрэгжүүлэх асуудлыг талууд харилцан зөвшилцэж, нэмэлт гэрээ байгуулах замаар шийдвэрлэж болно. Энэ тохиолдолд захиалгачийн төсөвт өргөөс давсан төсөл, хөтөлбөрийг Төсвийн тухай хуулийн 6.4.2-т заасан зарчмыг удирдлага болгон төсвийн тодотголоор шийдвэрлүүлэх арга хэмжээг авна.
- 10.3. Шаардлагатай бол энэхүү гэрээний 10.1-д заасан журмын дагуу талууд харилцан зөвшилцсөний үндсэн дээр гэрээг цуцалж болно.

#### **Арван нэг. Маргааныг шийдвэрлэх**

- 11.1. Хөтөлбөрийн өргийг тодорхойлох, хөтөлбөрийн санхүүжилтийг шилжүүлэхтэй холбогдон үсэх маргааныг холбогдох салбар яаманд хандаж шийдвэрлүүлнэ.
- 11.2. Хөтөлбөрийн хүрэх үр дүн, тоо хэмжээ, хугацаа, чанартай холбогдсон маргааныг гэрээлэгч талууд зөвшилцэж шийдвэрлэнэ. Хэрэв зөвшилцэлд хүрэхгүй бол шүүхээр шийдвэрлүүлнэ.

#### **Арван хоёр. Гэрээний урамшуулал ба хариуцлага**

- 12.1. Дүүргийн Засаг дарга нь гэрээний үүргийг зөрчсөн нь тогтоогдвол Төсвийн тухай хууль болон холбогдох хууль тогтоомжид заасан хариуцлагыг хүлээлгэнэ.
- 12.2. Дүүргийн Засаг дарга гэрээгээр хүлээсэн үүргээ хангалттай сайн биелүүлсэн тохиолдолд ажлын үр дүнгээс хамаарч түүнийг албан тушаалын жилийн цалинтай тэнцэх хүртэл хэмжээний урамшуулал олгох асуудлыг төсвийн ерөнхийлөн захирагч холбогдох хууль тогтоомжийн дагуу шийдвэрлэнэ.
- 12.3. Дүүргийн Засаг дарга нь гэрээгээр хүлээсэн үүргээ биелүүлээгүй, эрхэлсэн ажилдаа хариуцлагагүй хандсан тохиолдолд нийслэлийн Засаг даргаас сануулах шар карт өгнө. Сануулах шар картыг 2 удаа өгсөн тохиолдолд Улаан карт өгнө.

12.4. Дүүргийн Засаг дарга ноцтой зөрчил гаргаж, улаан карт авсан тохиолдолд энэхүү гэрээг цуцлана.

**Арван гурав. Гэрээ хүчин төгөлдөр болох**

13.1. Энэхүү гэрээ нь талууд гарын үсэг зурж, тамга /тэмдэг, дардас/ дарж баталгаажуулснаар хүчин төгөлдөр болно.

ЗАХИАЛАГЧ  
НИЙСЛЭЛИЙН ЗАСАГ ДАРГА БӨГӨӨД  
УЛААНБААТАР ХОТЫН ЗАХИРАГЧИЙН  
АЛБАН ҮҮРГИЙГ ТҮР ОРЛОН  
ГҮЙЦЭТГЭГЧ, НИЙСЛЭЛИЙН ЗАСАГ  
ДАРГЫН САНХҮҮ, ЭДИЙН ЗАСГИЙН  
АСУУДАЛХАРИУЦСАН ОРЛОГЧ  
НЯМАА ОВОГТОЙ БАТАА

(.....)



ХӨТӨЛБӨРИЙГ ХЭРЭГЖҮҮЛЭГЧ  
СОНГИНОХАЙРХАН ДҮҮРГИЙН  
ЗАСАГ ДАРГА  
МАЖИГМААГИЙН ЧИНБОЛД

(.....)

